

36-8-B-11  
DE APOSTOLICA  
S. PETRICATHEDRA

O. R A T I O

*Habita in Vaticana Basilica*

A D

CLEMENTEM XII.

PONT. OPT. MAX.

A JOANNE D'ANDREA  
NOBILI ULSSIPONENSI.



R O M A E

EX TYPOGRAPHIA VATICANA

M. DCC. XXX. V.

---

*Superiorum Facultate.*



(III)  
CLEMENTI XII.  
PONT. MAX.

JOANNES D'ANDREA  
P. F.



*Rationem hanc  
meam refugie-  
bam magno nomini tuo dica-  
re, BEATISSIME PATER, cum*

*tenuitatem operis, ingenique  
 mei imbecillitatem intuerer :  
 cum vero in ea de D. Petri Ca-  
 thedra sermo sit, nulli potiori  
 jure convenire, quam Romano  
 Pontifici judicavi. Cum enim  
 prope infinita sint Sedis Apo-  
 stolicae ornamenta, tum illud  
 certe maxime effulget, cum ha-  
 bet Pontificem Tui simillimum,  
 qui & res omnes Religionis san-  
 ctissime administret, & huma-  
 na negotia prudenter suscipiat,  
 obeat solícite, constanter perficiat.  
 Non est hujus loci, neque  
 temporis immortales laudes tuas  
 persequi, CLEMENS PONTIFEX  
 MAXIME, quarum plena est urbs  
 Roma, plena Italia, plenus or-  
 bis*

*bis universus . Percrebuit enim  
 ubique gentium , quam sapiens  
 sis in cogitando , quam acutus  
 in providendo , quam justus in  
 judicando , quam in agendo con-  
 stans , in ædificando magnifi-  
 cus , in opitulando liberalis , in  
 alloquendo humanus ; quam  
 denique opportune a Deo nobis  
 datus sis , his præsertim cala-  
 mitosis temporibus , quæ sicut  
 in Te uno Principe optimo , &  
 Parente beneficentissimo habent,  
 unde plurimum releventur , &  
 convalescant , ita Te diutissime  
 sospitem , salvumque volunt , &  
 desiderant . Superest unum ,  
 BEATISSIME PATER , ut quo  
 vultu , & animo omnes excipis ,*

quoque potissimum fratrem  
 meum ad Te pari cum munu-  
 sculo accedentem, cum verba  
 faceret de Ascensione Christi  
 Domini, excepisti, me quoque  
 cum hac Oratione tenui qui-  
 dem, atque inconcinna, sed p'e-  
 na certe obsequio, omnique erga  
 Te, Sedemque Apostolicam ve-  
 neratione digneris excipere, at-  
 que tueri.



## O R A T I O .



Egnum est Christi Domini Romana Ecclesia, BEATISSIME PATER, Regni autem hujus Solum, & Thronus Cathedra est Divi Petri, quam hodierna die fe-

stiva commemoratione celebramus. Quoniam vero ad Romanam Fidem perfidia, Cyp. lib. 3. ep. 3. non habet accessum, Eterodoxi, qui se partem esse hujus Regni falso credunt, inficiantur Cathedræ auctoritatem, nosque fidem illi plene adhibentes insectantur, & repræhendunt, perinde acsi honorem, & reverentiam, quæ uni Deo, ac Domino debita est, homini, qui in Petri Cathedra sedet, tribueremus. At 2. Tim. 3. quemadmodum Jannes, & Mambres resistenterunt Moyfi, ita & hi resistunt veri-

(VIII)

tati ; sed non ultra proficient : insipientia enim eorum manifesta erit omnibus , sicut & illorum fuit . Nam cum Romanum Pontificem colimus , eique divina imperanti paremus , non quasi unum de Principibus , aut Regibus terræ suspicimus ,  
*L. 2. c. 8.* sed cum cum D. Bernardo potestate Petrum , unctione vero Christum esse credimus , palamque confitemur . Neque enim  
*Aug. l. 16. con. Fauf.* sua sunt , quæ dicit , sed Dei , qui in Cathedra unitatis doctrinam posuit veritatis .

Sic natura institutum est , ut unius corporis unum sit caput , & quod varium est , & multiceps , ad monstrorum genus referatur . Deus autem , cujus perfecta sunt opera , cum Ecclesiam constituit , quæ Sponsa sua esset sine ruga , & sine macula , ita eam exornavit , & perfecit , ut cum illam inde aspiceret , maxime dotes ejus omnes adamaret , unitatem vero tanquam pulcherrimi operis pretium commendaret : una est Columba mea , perfecta mea . Hinc factum est , ut quicumque illam divideret , reus illico Divinæ Majestatis constitueretur , & Schismaticus ,  
*Can. 8.* & peccator esset , qui contra Petri Cathedram alteram collocaret . Quare enim Deus unam constituit , nisi ut unitas ab omnibus servaretur , & ne Apostoli singu-



## (IX)

gulas sibi defenderent? Fundavit Joannes Ecclesiam in Oriente, fundavit in Occidente Jacobus, fundaverunt in aliis orbis partibus cæteri Apostoli; sed eorum exordium ab hac unitate profectum est, & Primatus Petro datus, ut una Christi Ecclesia, & Cathedra una monstraretur. Quam igitur inconsulte discesserunt multi ab auctoritate illius Cathedræ, a qua instructi, quamque sequuti in omnibus Apostoli orbem terrarum Fidei lumine illustrarunt! quam infeliciter privati homines deseruerunt Thronum Religionis, cui non coronas solum, & imperia, sed & internos sensus, animumque non subjicere Reges, atque Imperatores nefas esse putaverunt! quam injuriose contempserunt eam Sedem, cui se gentiles Philosophi, cui se nationes barbaræ, se denique gentes extremæ subdiderunt! At faxit tandem aliquando Deus, ut resipiscant, & convertantur: nam extra hanc Eccle- Fulg. lib. 1. c. 22. siam nec Christianum nomen aliquem juvat, nec Baptismus salvat, nec peccatorum remissio accipitur, nec vitæ æternæ felicitas invenitur. Est procul dubio ei, qui in Arca Noe non est, communi naufragio pereundum.

Sed nulla esset securitas unitatis, nisi ex promissis Dei esset quoque Cathedra, Aug. lib. 3. con. Parm.

Pe-

1. *Tim.* 3. Petri columna, & firmamentum veritatis. Unam esse contendunt Ecclesiam suam novatores, sed cum non sita sit supra firmam petram, prævalent adversus eam portæ inferi, a quibus concussam, ac labantem nituntur novis semper confessionibus fidei, veluti sustentaculis confirmare. Sed tam variæ, multiplicesque confessiones sese mutuo destruant, necesse est, cum una fides sit, simplexque veritas, quæ una Catholicorum confessione tota complexa est, semperque compræhensa. Quid enim per octodecim fere sæcula non dicam in veritate Catholica, sed ne in verbis quidem, quibus eam profitemur, immutatum est? quid unquam in rebus Fidei ausum, & tentatum; quid in doctrina morum solutum, quid vel in uno legis apice innovatum, vel relaxatum? Dicere sane possumus, & alta voce ad hanc usque diem prædicare, quod tam multis ab hinc annis affirmans gloriabatur Irenæus: quæ est ab Apostolis traditio, & annunciata hominibus fides, pervenit usque ad nos. Ad hanc enim Ecclesiam propter potentiorē principalitatem necesse est omnem convenire Ecclesiam. Conveniant ergo Eterodoxi,  
& qui
- Lib.* 3. c. 2.